



KERETA Proton Wira yang sudah diubah suai untuk menyeludup minyak petrol bersubsidi ke negara jiran.

Tak munasabah Wira isi 187.06 liter petrol

Jeli: Tindakan licik seorang lelaki warga Thailand menyeludup petrol dengan kereta diubah suai digagalkan pihak berkuasa di sebuah stesen minyak di sini, semalam.

Dalam operasi jam 12 tengah hari itu, suspek berusia 24 tahun turut ditahan anggota Kementerian Perdagangan Dalam Negeri dan Hal Ehwal Pengguna (KPDNHEP) negeri untuk siasatan lanjut.

Pengarah KPDNHEP negeri, Adnan Abd Rahman berkata, berdasarkan maklumat awam, pihaknya mengekori Proton Wira dipandu seorang lelaki ke sebuah stesen minyak di daerah ini.

Katanya, hasil pemerhatian mendapati suspek membuat belian petrol yang

tidak munasabah untuk digunakan kenderaan persendirian.

"Serbuan terus dilakukan dan anggota mendapati suspek membuat pembelian 187.06 liter petrol RON95 bernilai RM389.10. Semakan resit pembelian disahkan oleh stesen minyak.

"Siasatan mendapati suspek menggunakan tangki simpanan diubah suai untuk menyeludup petrol itu ke negara jiran," katanya dalam satu kenyataan media, semalam.

Menurutnya, susulan itu, pemilik kenderaan ditahan untuk siasatan lanjut.

"KPDNHEP turut membuat sitaan barang dianggarkan bernilai RM6,000. Kes disiasat mengikut Akta Kawalan Bekalan 1961," katanya.

FAKTA

Suspek guna tangki simpanan diubah suai untuk seludup petrol ke negara jiran